

Ecco: ese in tanti in Compagna veu dî avei a fòrsa de poei dî a nòstra comme zeneixi che no veuan atro che vedde a nòstra bella tæra cresce e prosperâ senza tanti maniman e senza pensâ che i tenpi pasæ ean megio de quelli d'ancheu (anche perché sta còsa chi pròpio a no l'è vea). Segûo: 'na vòtta tutti se sentivan ciù zeneixi, a nòstra bella lengoa zeneize a l'ea parlâ da tutti pe-a stradda, in caza, tra conoscenti e sconosciûi, se sentivimo in pò tutti fræ sciben che n'ea cao ratelâse tutte e vòtte che se poeiva. Gh'è pòco da dî: quella a l'ea a sociêtæ d'aloa.

Ancheu e cöse son diverse: gh'è a televixon e i telefonin; gh'è Internette e Google; se sta de ciù in caza e s'â poia di foresti. E se sente, drent'a-o cheu, che o nòstro "ese zeneixi" cian cianin o scenta e quelli ch'ân fæto do maniman o seu modello de vitta ti i senti dî: "tant'òrmai de zeneixi no ghe n'è ciù". Ma niatri sòcci da Compagna semmo ben che sta còsa chi a no l'è vea: zeneixi ghe n'è, e ghe n'è tanti. Ma stan ascoxi, chisà dove, con pöca coæ de fâse riconosce. Pròpio pe destanâli e dâghe torna a giöia d'ese quelli che son, A Compagna a deve vegnî senpre de ciù o ponto de riferimento di zeneixi che veuan che Zena e a Liguria no s'ascòrdan de seu tradiçioin e de questo mòddo tutto nòstro d'ese çitadin de Zena e do mondo. E l'è pròpio quello che semmo apreuvo a fâ.

A stradda meistra a l'è quella ch'a n'â mostròu de longo a stöia: bezeugna che segian i zoeni a portâ in Compagna a seu pascion, a seu vitalitæ, e seu idee, a seu coæ de vive torna inte 'na sociêtæ ch'a profumme de zeneize inte ogni seu recanto. Pe questo no semmo stæti li a fâse

rozigiâ o... nazo da-e mosche: comme pure l'ea previsto da-i vegi statuti, e da quello neuvo ascì, emmo incoragiòu l'avertûa de 'na seçion stacâ fæta e gestîa da zoeni. Sta seçion a se ciamma CLISCET, 'na sigla ch'a veu dî: "Compagna Ligure Sarvagoàrdia Coltûa E Tradiçioin". Tutti quelli che aderiscian a-a seçion CLISCET son primma de tutto sòcci da Compagna; però peuan aotonomamente organizâse e dâse da fâ pe inandiâ de ativitæ neuve, diverse da quelle che za femmo, e pe ese de riciammo pe atri zoeni da portâ in Compagna. Tanto pe no lasciâ chi me leze a bocca sciuta, diö che loiatrì, insemme a mi, son apreuvo a louâ pe mette in grande vocaboloio zeneize italian e italian zeneize in sciâ Ræ, in sciò modello de Wikipedia. Ma, fæmelo dî, a còsa ciù inportante a l'è che un pò de zoeni ân decizo de intrâ in Compagna, de fâ publicitæ a-a Compagna pe continuoâ a fâ vive questa nòstra antîga e prestigioza asociaçion.

Sò de dî 'na còsa che no l'è goæi profonda, ma l'è ciæo che senza zoeni se meue! Un benvegnûo dunque a tutti liatri e a tutti quelli che porian portâ: saian loiatrì i nòstri eredi pe tegnî vivo o nòstro zeneize e pe continuoâ e nòstre tradiçioin. Demoghe 'na man e çerchemmo, tutti, d'atrovâ neuvi zoeni pe avei 'na seçion ch'a cresce senza afermâse ciù.

Anche sta speranza chi a mostra comme a Compagna a segge viva e con tanta coæ de cresce pò-u ben de Zena e da Liguria.

Alêgri!

*Largo ai zoeni: la quarta elementare del maestro Carta, Levanto, 1894-1895.  
Dal volume "Si comincia da una figlia" di Paolo Giardelli, Le Mani Microart's Edizioni, 2005.  
Per gentile concessione dell'Autore e dell'Editore.*

